

-Quarto Premio (ex aequo) ordine alfabetico-

IN PODERE 'E SU TEMPUS

*"Si enim fallor, sum" Sant' Austinu de Ippona,
dae Sa tzittade de Deus XI, 26*

Isbàglio,
duncas so.
So lughe, so iscuru,
so veridade e fàula.
So abba e so siccagna,
so morte e sufferèntzia,
so gosu e so vida.
So che-i s'ùltima
foza ingroghida
in podere 'e su 'entu:
chi nd'apo a falare
isco ma non conosco
cando...

E ando a s'appalpu,
isconnòschidu e rebelle,
ando contrabbentu
abboju a custu tempus istragosu
chi su coro mi lantat
e m'innièddigat s'àmina.
Custu,
custu ebbia paret
siat su fadu
chi nos cunzedit
custu tempus fràzigu
chi l'at anzadu...

E deo,
ca nachì so poete,
sigo, comente faghent sos poetes,
a baulare a sa luna
e lasso
chi siat sa poesia,
chena 'oghe, a ticchirriare
su dolu
de custu mundu feu.

ANTONELLO BAZZU - SASSARI